

Onno de Swart, Director di Aruba Airlines

Nos ta dispuesto pa bai Corte si ta necesario




DEN combersacion cu Onno de Swart, director di Aruba Airlines, e ta splica cu henter e asunto aki ta cuestion di un discordia entre un doño di trabou y su empleado y awor cu partidonan no a logra yega na un convenio, kier core bai den publicidad pa mancha number y imagen di e compania.

Onno de Swart a splica cu Aruba Airlines a busca Damaris Suarez pa duna les y training na e stewardessnan di Ex Mexicana de Aviacion pa asina nan por refresh y bolbe ta certifica pa bula. A busca e stewardessnan aki di Mexico ya cu nan tin experiencia caba y Aruba Airlines kier a cuminsa mas liher cu ta posibel. E Stewardessnan aki lo haya un contract di 1 año y despues nan lo train e grupo di stewardess local cu lo take over despues. Departamento di Labor y Departamento di Aviacion Civil ta na altura di e situacion y tur proceso ta canando nan caminda manera mester ta.

Unabes cu Sra Suarez tabata na Aruba el a propone pa haci algun revision den e Flight Safety Manual cu ya tabata aproba pa e Departamento di Aviacion Civil. Durante su estadia Damaris Suarez a haya sigur dos pago extra di daggeldvergoeding cual e no ta menciona pero cu Aruba Airlines si tin prueba di nan. Aruba Airlines a pag'e tambe adelanta 75% di e suma cu el a acorda den prome instante. Segun Onno de Swart, loke cu a bai robez ta cu Suarez a cobra un suma adicional di 6 mil dollar pa repasa e manual di seguridad cu e no a discuti di antemano

cu e gerencia di Aruba Airlines y aki ta unda cu e disputa a cuminsa y nan no por a yega na un acuerdo satisfactorio pa ambos partido. Suarez lo ta cobrando e suma astronomico aki haciendo manera cu el a traha e manual pero loke el a haci ta repasa e manual cu ya tabata aproba caba pa Departamento di Aviacion Civil.

Segun Onno de Swart, nan a ofrece Damaris Suarez diferente oferta pa yega na otro pero tur a wordo nenga. Despues di esaki, na luna di December, Damaris Suarez a duna gerencia di Aruba Airlines un deadline pa haya su pago y a bisa cu si esaki no sosode e lo bai medionan di comunicacion pa kibra e compania prome cu e ni cuminsa drechi. Prome cu el a bolbe Merca, Suarez a asta coi su certificadonan cu e mester a duna e stewardessnan pa e training cu nan a ricibi y a bai cu nan. Y aki ta caminda cu e ta poniendo presion riba Aruba Airlines y ta menasa pa pidi Departamento di Aviacion Civil pa kit'e for di e registro como un Instructor pa Aruba Airlines. Si e haci esaki, e aerolinea lo tin cu bai haci tur training di nobo pa asina certifica su stewardessnan cual lo ensersa cu lo tarda tur procedura un poco mas y lo costa e compania mas placa tambe. Onno de Swart a finalisa bisando cu e ta lamenta cu e situacion a bai asina leu inecesariamente pero cu Aruba Airlines ta dispuesto pa bringa te final y bai Corte si ta necesario ya cu nan no ta sinti cu nan a actua malo y tin prueba preto riba blanco di esaki.



Find us on Facebook Like
www.facebook.com/AWEMainta